



Broj: 04-04-4-2033/21
Sarajevo, 5. 8. 2021. godine

**SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA
„PRAĆENJE REALIZACIJE PREPORUKA IZ IZVJEŠTAJA 'EFIKASNOST RADA OPĆINSKIH SUDOVA'“**

Ured za reviziju institucija u Federaciji Bosne i Hercegovine proveo je praćenje realizacije preporuka iz izvještaja „Efikasnost rada općinskih sudova“, objavljenog 2018. godine. Cilj je bio ispitati preduzete aktivnosti i ocijeniti u kojoj mjeri su date preporuke realizovane.

Analizirane su aktivnosti općinskih sudova: Gračanica, Gradačac, Lukavac, Tuzla, Mostar, Kiseljak, Ljubuškim i Jajce. Riječ je o sudovima koji su obuhvaćeni uzorkom revizije učinka iz 2018. godine i kojima je dato ukupno pet preporuka. Pored toga, ispitano je postupanje Federalnog ministarstva pravde na realizaciji jedne preporuke koja mu je bila upućena.

Ustanovljeno je da **niti jedan općinski sud nije u potpunosti realizovao sve preporuke**, dok je većina preduzela djelimične aktivnosti na njihovoj realizaciji. To za posledicu ima da **u sudovima i dalje nije osigurano rješavanje predmeta u utvrđenim rokovima, niti je u dovoljnoj mjeri unaprijeđena starosna struktura neriješenih predmeta**. Primjera radi kod šest sudova (Gradačac, Lukavac, Tuzla, Mostar, Ljubuški i Jajce) preko 50% predmeta riješeno je s prekoračenjem optimalnih rokova.

Internim aktima većine sudova i dalje nije propisan način praćenja trajanja i poštivanja rokova u rješavanju pojedinačnih predmeta, te je **zostalo adekvatno praćenje vremena koje osoblje suda efektivno utroši na rješavanje pojedinačnih predmeta**.

Kad je u pitanju starosna struktura neriješenih predmeta, konstatovano je da kod većine općinskih sudova i dalje postoji **značajan udio onih koji nisu riješeni više od dvije godine od njihovog pokretanja**. Pored toga, kod tri suda (Lukavac, Mostar i Tuzla) u 2020. godini **bilo je preko 40% predmeta koji nisu riješeni ni u roku od pet i više godina**.

Federalno ministarstvo pravde nije realizovalo datu preporuku, odnosno nije iniciralo da VSTV BiH provede detaljne analize sudijskih normi s ciljem njihovog unapređenja. Međutim, uprkos nedovoljno proaktivnom odnosu Ministarstva, VSTV BiH je preduzeo aktivnosti na unapređenju pravilnika koji uređuju pitanje sudijskih normi.

Uvažavajući činjenicu da je predmetna oblast od općeg interesa za cjelokupnu društvenu zajednicu, Ured za reviziju cijeni da je neophodno dodatno angažovanje općinskih sudova kako bi se unaprijedila efikasnost rješavanja sudskih predmeta, što bi osiguralo pružanje kvalitetnih i blagovremenih pravosudnih usluga, koje zadovoljavaju potrebe građanki i građana Federacije BiH i društva u cjelini.

Kompletan Izvještaj revizije učinka dostupan je na internet-stranici Ureda za reviziju: www.vrifbih.ba.

GENERALNI REVIZOR

Dževad Nekić

